

**DAGING
KAMA BANTANG
DESA ADAT BALANGAN**

Sara citta.....	1
SARGA I .ARAN LAN WEWIDANGAN.....	2
Palet 1. Aran Desa.....	2
Palet 2. Wawidangan.....	2
SARGA II .PAMIKUKUH, PATITIS LAN USAHA.....	3
Palet 1. Pamikukuh.....	3
Palet 2. Patitis.....	3
Palet 3. Usaha.....	4
SARGA III .SUKERTA TATA PAKRAMAN.....	4
Palet 1. Pakraman.....	4
Palet 2. Prajuru.....	6
Palet 3. Kukul.....	8
Palet 4. Paruman.....	9
SARGA IV .SUKERTA TATA AGAMA.....	10
Palet 1. Dewa Yadnya.....	10
Palet 2. Resi Yadnya.....	12
Palet 3. Pitra Yadnya.....	13
Palet 4. Manusa Yadnya.....	16
Palet 5. Bhuta Yadnya.....	17

SARGA V .SUKERTA TATA PAWONGAN.....	19
Palet 1. Pawiwahan.....	19
Palet 2. Nyapian.....	23
Palet 3. Angkat Sentana.....	26
Palet 4. Waris.....	27
SARGA VI.DRUEN DESA LAN KAHYANGAN DESA.....	28
Palet 1. Druen Desa.....	28
Palet 2. Druen Kahyangan Tiga.....	28
SARGA VII.PASUKERTAN DESA.....	29
Palet 1. Pekarangan.....	29
Palet 2. Tetanduran lan Pepayon.....	30
Palet 3. Wewangunan.....	31
Palet 4. Wewalungan.....	32
Palet 5. Pemargin Sawa.....	33
Palet 6. Penyanggra.....	34
Palet 7. Bhaya.....	34
Palet 8. Sasebelan.....	35
VIII. WICARA LAN PAMIDANDA.....	36
Palet 1. Wicara.....	36
Palet 2 Pamidanda.....	36
SARGA IX.PENAMPIH.....	38
Palet 1. Nguah - Nguwuhin.....	38
Palet 2. Pamidarta.....	38

OM AWIGHNAMASTU NAMA SIDDHAM
OM SARASWATI BHAKTYA NAMA.

Om Swastyastu

Malarapan saking panghyangning kalih paswecan Ida Sanghyang Widhi Wasa asung wara nugraha ngawentenang kahuripan sekala niskala ring bhuana agung lan bhuana alit, maka don tata krama sane kawastaning bhuana jangkep saha Tri Hita Karana ngastuti karahayuan, tata susila, tata krama sane kabaat ring Desa Adat, angge mikukuhin agama Hindu drowene, nganutin Desa Kala Patra minakadi Tri Semaya ngaran atita, nagata, wartamana, miwah tri pramana, ngaran pratyaksa, anumana, agama kadulurin antuk karaketan sajeroning krama Desa Adat sane siosan, minakadi tulung tinulung, salunglung sabayantaka, gumanti ngamangguhing karahajengan miwah kerta raharja ring Desa Adat.

Sajabaning dresta inucap, minakadi Pancasila, Undang-Undang Dasar 1945, miwah saha-lan peraturan Negara Republik Indonesia, saha tan maren kainggulang, tan wenang miwah tan patut kalempasin antuk awig -awig Desa Adat puniki

Titanen sinamian saking krama Desa Adat Balangan mapidahdah ngardi awig - awig sane kamanggehang ring wewengkon Desa Adat Balangan, sekadi ring sor.

SARGA I.
ARAN LAN WEWIDANGAN DESA

Palet 1,
ARAN DESA
Pawos 1.

Desa puniki mewasta Desa Adat Balangan

Palet 2.
WEWIDANGAN
Pawos 2.

Wewidangan Desa Adat Balangan mawates nyatur Desa :

- Sisi Kangin : Desa Adat Babakan, Kabupaten Tabanan
- Sisi Kelod : Desa Adat Sembung Sobangan
- Sisi Kauh : Desa Adat kuwum
- Sisi Kaler : Desa Adat Berteh, Kabupaten Tabanan

Pawos 3.

Asing - asing banjar patut wenten bates ipun, maderbe bale banjar, bale kulkul lan parhyangan.

SARGA II.
PAMIKIKUH, PATITIS LAN USAHA

Palet 1.
PAMIKUKUH
Pawos 4

Desa Adat Balangan ngamanggehang pamikukuh :

1. Pancasila manut kamanggehang ring Mukadimah Undang - Undang Dasar 1945.
2. Undang -Undang 1945.
3. Perda No. 6 Tahun 1986, Gubernur Kep. Tk. I Propinsi Bali.
4. Tri Hita Karana
5. Pasilih asih sanglunglung sabhayantaka.

Palet 2.
PATITIS
Pawos 5.

Patitis Desa Adat Balangan :

1. Ngrajegang Agama Hindu majajaran antek astiti bhakti ring Ida Sanghyang Widhi Wasa.
2. Nincapang kaweruhan Krama Desa Adat kalih kawerdianning Bhoga, Upabhoga, lan Paribhoga.
3. Ngawangun kasukertan ring pakraman, kandugi mangguhan kajagadhitan malarapan pasilih asih salunglung sabhayantaka.

Palet 3
USAHA
Pawos 6

Patitis ring ajeng kalaksanayang majalaran antuk triwarga, Dharma, Artha, lan Kama.

SARGA III
SUKERTA TATA PAKRAMAN

Palet 1.
PAKRAMAN
Pawos 7

Sane sinanggeh krama, sang sapa sira sampun maderbe utawi madruwe karang paumahan ring sawengkon Desa Adat Balangan (ayah an manut perarem).

Pawos 8.

Sapasira ugi ngawit jenek ring sawengkon Desa Adat Balangan madruwe utawi maduwe paumahan nganut Agama Hindu, naur batu - batu, pakraman punika taler kawastanin Krama Adat.

Pawos 9

Sapa sira ugi durung manut pawos 7 lan 8 ring ajeng inucap, sinanggeh dunungan (krama tamiu).

Pawos 10.

Sang sane sinanggeh dunungan sampun jenek lintang ring asasih saha sampun madrebe utawi madruwe pangupajiwa patut keni sumbangan manut pararem.

Pawos 11.

Sinalih tunggil krama Desa sane madruwe pianak / oka sane ngawitin mapikuren keni ayahan panyelediyi utawi panyade.

Pawos 12.

Sinalih tunggil krama Desa Adat sane sampun madrebe tur nganggehang ayahan panyelediyi, krama punika tan keni ayahan lan papeson malih.

Pawos 13

Krama sane balu keni ayahan lan papeson lanang - istri anutang ring balu luh lan balu muani

Pawos 14

Ayahan kengin kagentosin antuk wakil manut pararem banjar.

Pawos 15.

Sane polih luput ring Desa inggih punika : Bendesa Adat, Penyarikan, Patengen, Pamangku Kahyangan Desa, Pamangku Pura sane kaempon lan kaemong olih Desa, Sang Sulinggih lan Pamangku Sonteng.

Pawos 16.

Luputan sane manggeh ring pawos 15 patut katerimayang antuk panyelediyinyane.

Pawos 17.

Sane tan nyarengin utawi luput ayahan ring Desa inggih punika Hansip, Kader UPGK (Pos Yandu)

* . PAMITEGES INDIK AYAHAN.

1. Prade rikalaning ngayah wenten sinalih tunggil krama matilar sadurunge puput karya, wenang krama inucap keni sisip manut pararem.
2. Krama sane wusan makrama ring Desa Adat Balangan tan polih pahpahan artha brana Desa (guwak ngutang taluh kawastanin).

Palet 2.

Prajuru.

Pawos 18.

Prajuru Desa inggih punika sang sane ngenterang Desa Adat.

Pawos 19.

Prajuru Desa wenten kalih soroh :

1. Prajuru Desa : Bendesa Adat , Penyarikan , Patengen lan Kasinoman ngenterang druwen desa.
2. Prajuru Banjar : Kelihan Suka duka, Penyarikan, lan Kesenoman ngenterang druwen Banjar.

Pawos 20

Prajuru ngenterang Desa Adat mawaneng limang warsa (sejabaning patengen petang diri sane nanem tuwuh).

Pawos 21.

Prajuru kagentosin miwah kapilih madasar antuk pararem krama Desa risampun prajuru kaadegan kaduluran antuk madewa saksi ring pura Bale Agung kaprebiya antuk Desa Adat.

Pawos 22.

Sang kaanggehang parajuru, krama Desa sane magama Hindu mayusa kirang langkung tigang dasa warsa, ngamenggahang sampun marabian lan weruh ring aksara.

PITEGES PALET 2 PARAJURU :

1. Bendesa pinaka panua kasanggra antuk panyarikan (juru surat) patengen (juru raksa).
2. Swadharmaning Bendesa Adat, ngenterang saha ngalaksanayang sadaging awig - awig muang pararem Desa.
3. Miletin tur ngenterang krama rauhing Desa ngupadi antuk patitis.
4. Maosang kalih niwakang pamutus arepe ring wicara krama Desa.
5. Maka Duta Desa muah maweh ring sapesira ugi.
6. Prajuru sane iwang pelaksannanyane dados kararianang manut pararem.

Palet 3.
KULKUL

Pawos 23.

Kulkul punika sarana Desa utawi Banjar maka cihna ring pasikian pakayun ri tatkala suka duka.

Pawos 24.

Suaran kulkul sane karajegang mabina - binaan , artin ipun sekadi ring sor puniki :

1. Suara apisan tugak artin ipun sinalih tunggil krama wenten ngembasang putra.
2. Suara kalih tulud banban artin ipun krama sane kadauhang patut medal manut kabuatan.
3. Suara ping tiga tugak artin ipun wenten sinalih tunggil krama banjar kalayu sekaran utawi padem.
4. Suara ping kalih artin ipun sinalih tunggil pianak utawi okan krama Banjar ngrangkat.
5. Suara bulus ngelantur artin ipun nyihmayang bhaya puun utawi geni bhaya.
6. Suara bulus mewali - wali artin ipun cihna bhaya wenten anak ngamuk.
7. Suara ngompang banban artin ipun wenten bulan utawi matan ai kapangan.
8. Suara atulud megat artin ipun ayahan pakaryanne tan durus.
9. Suara kulkul ping dua ngompang , cihna sinalih tunggil krama Desa maderbe putra kembar.

Palet 4.

PARUMAN.

Pawos 25

Paruman luih ipun : Paruman Krama Banjar, Paruman Krama Desa, Paruman prajuru Banjar lan Paruman Prajuru Desa.

Pawos 26.

Paruman Desa nganutin kabuatan, sakirang ipun nyabran asasih apisan nuju rahina Wrespatining Tumpek . Paruman prajuru Desa kabuatang padgata kala.

Pawos 27.

Paruman kaping siki lan kaping kalih, taler tan nganutin pawos ring ajeng paruman kaping tiga kalanturang . panyungkem sane rawuh wenang ngarajegang tetepasan.

Pawos *28.

Panyungkem sane tan ngrawuhin peparuman , patet kasisipang, manut pararem.

Pawos 29.

Panyungkem sane tan ngrawuhin peparuman tur sampun mapasadok ring prajuru, tan kasisipang.

Pawos 30.

Tetepasan paruman kabawos pastika ring sampun kacumponin manut panyungkem lan pararem gilik saguluk utawi mupakat.

Pawos 31.

Tetepasan kanggehang pastika ri sampun kacumponin lintang ring atenga sakeng sang rawuh.

* PAMITEGES PARUMAN

1. Prajuru Desa madruwe wewenangan wantah ngarincikang pidabdab usaha Desa kapungkur saha tan wenang ngamedalang tategenan ring krama sadurunge kaingkupang antuk krama Desa sajawaning padayata kala.
2. Ritakala paruman patute , prajuru muang krama Desa sane parum ngangge bhusana Adat nyelempot saha tan kedadosang makta sanjata.
3. Paruman langkung ping tiga taler tan ngemedalang tetepasan prajuru wenang nunas bawos ring Guru Wisesa.
4. Tetepasan paruman maka pamiteges patut kasobiahang.
5. Ritakala paruman tan maren ngarcana ring Ida Bhagawan Panyarikan maka widi-widana canang sari lan cane.
6. Ri kala jagi ngawitih ngalaksanayang panyaheah saha ri wusan nyahcah paruman kakawitih
7. Tan kalugra ngawetung suara gora utawi byuta, yan pradene wenten asapunika kasisipang manut pararem kabawos keni pacamil.

SARGA IV.

SUKERTA TATA AGAMA

PALET 1.

DEWA YADNYA.

Pawos 32

Pura-pura sane kamanggehang kahyangan tiga : Pura Desa Bale Agung , Pura Puseh lan Pura Dalem.

Pawos 33.

Parhyangan miwah wewangunan ring kahyangan tiga kaaci saha kaprabeyaning ian kapiara olih krama desa.

Pawos 34.

Sahananing pura ring sawewengkon Desa Adat Balangan patut kaaci tur kapelihara olih sane nyungsurung.

Pura-pura sane kaaci ian kapiara siosan ring Pawos 32 : Pura Pucak Gunung Agung, Pura Dalem Surya, Pura Malanting, Pura Tapang kasungsurung antuk krama Desa Adat Balangan.

Pawos 35.

Sapa sira keni sasebelan utawi kacuntakan tan kadadosang ngranjing ring Pura-Pura Kahyangan Tiga muah Pura-pura sane lianan.

Pawos 36.

Sajeroning sasengker kacuntakan tan kadadosang ngranjing ring Kahyangan Tiga, muah Pura-pura sane tiosan, tur kapatutang nganutin tattwa Agama

Pawos 37.

Sane mamurug pawos 35 miwah 36 ring ajeng kasinanggeh kasisipang tur kadanda manut perarem.

PALET 2.
RESI YADNYA.
Pawos 38.

Ring Pura-pura Kahyangan Tiga lan pura-pura sane tiosan patut kaadegang pamangku.

Pawos 39.

Pamangku Kahyangan Tiga lan pamangku sungungan Desa Adat Balangan tan keneng cuntaka.

Pawos 40.

Ngadegang pamangku sane sampun kalaksanayang antuk krama Desa Adat Balangan manut sekadi ring sor :

1. Ngawilangin tur ngamanggahang turun-temurun
2. Nunas pawuwus wara nugraha Ida Sang Hyang Widhi Waça
3. Sampun sinanggeh kapingit tur nganutin Dresta.

Pawos 41.

Prade sinalih tunggil Pamangku Kahyangan Tiga kapialang, pangacine kèngin kamargiang olih pamangku Kahyangan Tiga sane tan keni kapialang manut pawarah Bendesa.

Pawos 42.

Sehananing sesari patut kalap antuk Pamangku.

❖ PAMITEGES PALET 2 RSI YADNYA

1. Pamangku Kahyangan sane kaempon olih Desa Adat mawinten kapamangkuan.
2. Pamangku kahyangan sane kaempon olih Desa Adat sane mantuk/seda patut kaaben, kasanggra olih Krama Dèsa Adat Balangan, manut pararem.
3. Pamangku Kahyangan Tiga, lan sane tiosan kaaturang bhusana putih kuning arangsukan saking Dèsa Adat Balangan (rikala pawintenan).

PALET 3.

PITRA YADNYA.

Pawos 43.

Genah ngeseng utawi genah mendem sawa amongan Kraina Dèsa Adat Balangan sane mägarna Hindu manut sahaning upakara-upakara ipun kawastanin setra.

Pawos 44.

Rahina pamendeman utawi pangesengan sawa ring setra patut ngarsayang pamargi ring Bendèsa Adat lan sang Wiku.

Pawos 45.

Rahina pamendeman utawi ngeseng sawa ring setra tan wenang ring setra patut ngarsayang pamargi ring Desa Adat Balangan makadi ring sor :

1. Piodalan Kahyangan Tiga.

2. Prawani, Purnama miwah Tilem.
3. Saraswati, Pagerwesi, Galungan, Kuningan, rerahinan jagat sane siosan.
4. Ida Bhatara Mahyangan Tiga kantun nyejer.

Pawos 46.

Sapa sira ugi tan kapatutang nginepang bambang ring sètra, bambang sane kadurusan kaanggen mendem sawa patut kaupakara sapatutipun.

Pawos 47

Rare sane durung kepus udel lan durung kupak untu padem, patut kapendem pramangkin tan ngétangang dewasa.

Pawos 48.

Sajeroning dèsa ri kala jaga mendem sawa lintangan ring adiri ring arahina tur sètra tunggal, patut sane nanpekan sètra mamargi rihinin.

Pawos 49.

Pawos 48 ring ajeng taler kamargiang ri kala palebon utawi ngaben.

Pawos 50.

Sajeroning Dèsa tan kadadosang mendem sawa lan ngaben ring arahina ring sètra tunggal.

Pawos 51.

Layon sane majalaran salah pati, ulah pati, dados kabakta budal tur kaupakara, saha kapendem utawi kaaben, sepatut ipun.

Pawos 52.

Sapa sira ugi sane pacang ngaben patut masadok ring parajuru banjar utawi Bendesa Adat.

Pawos 53.

Asing-asing krama Dèsa sane maagama Hindu padem patut kaaben. Ngaben kalaksanayang olih sane maderbe sawa utawi krama Dèsa Adat antuk pengeritan manut pararem Dèsa Adat.

Pawos 54.

Dunungan utawi panumpang, sane maagama Hindu, sane wenten kulawarganyane makrama Dèsa Adat iriki, ri kala kapialang padem saha jaga mapendem utawi kageseng ring sètra, patut naur batu-batu manut pararem sapa pangupakara sètra sapatut ipun.

Pawos 55.

Asing-asing krama Dèsa tan kapatutang mendem utawi ngeseng sawa, wiyadin ngeseng sawa pereresian ring sajeroning karang paumahan, tegalan, sawah sejebag Dèsa Adat Balangan.

PALET 4.
MANUSA YADNYA.
Pawos 56.

Manusa yadnya inggih punika upakara-upakara dharmaning manusa ngawit saking patemoning kama petak kalawan kama bang ri sajeroning garba .

Upacara-upacara inucap madudonan sekadi ring sor :

1. Magedong-gedongan.
2. Rare embas
3. Kepus udel.
4. Roras rahina.
5. Tutug Kambuhang.
6. Nigang sasihan utawi matelu bulanan.
7. Pawetonan utawi aoton / enem bulanan.
8. Tugtug kelih utawi rajaswala, rajasinga.
9. Matatah utawi mapendes.
10. Pawiwahan.
11. Mawinten.

Upakara-upakara inucap, nista, madya, utama marut sastra agama saha catur dresta.

PALET 5.
BHUTA YADNYA.
Pawos 57.

Bhuta yadnya inggih punika upakara-upakara mabyakala ring pertiwi lan kahyangan, sarwa prani saha upakara-upakara ring bebhutan.

Pawas 58.

Upakara pabyakala ring sarwa prani luire :

1. Ring sarwa temuwuh rikala Tumpek Pangatag (Saniscara Kliwon Wariga).
2. Ring sarwa ingon-ingon rikala Tumpek Kandang (Saniscara Kliwon Uye).
3. Upakara Pakala-kalaan manusia manut wiguna, kabawos pabyakala.

Pawas 59.

Upakara Pabyakala ring pertiwi. Kahyangan lan Bebutan kawastanin macaru.

Pawas 60.

Pacaruan inucap ring ajeng, nista, madya, utama manut wiguna sekadi ring scr

1. Eka Sata.
2. Panca Sata.
3. Panca Kelud.
4. Panca Sanak.
5. Baliksumpah
6. Tawur Agung

7. Rsi Gana (manut pangaladesa)

Pawos 61.

Sajabaning upacara ring ajeng kawèntenang upakara :

1. Banten saiban utawi yadnya sesa nyabran uwusan maratengan.
2. Masapuh-sapuh ring Pura utawi parhyangan-parhyangan.

Pawos 62.

Nangken ngawarsa ri kalaning Tilem Kasanga kawèntenang Tawur Kesanga, ketah kebawos ngrupuk, maka cihna pacang magpag rahina panyepian. Upacara penyepian kelaksanayang, antuk krama Dèsa Adat Balangan manut "Lontar Sundarigama" inggih punika : amati geni, amati karya, amati lelungan, amati lelungan.

Pawos 63.

Pabratan inucap kaiaksanayang saha karnargiang saking semengan ngantos benjang semengan saking rahina nyepi.

Pawos 64.

Sapasira mamurug kecaping pawos 63 ring ajeng keni danda manut perarem.

Pawos 65.

Benjang semengan wus rahina panyepian ngembak geni maka cihna pangawit Icaka warsa anyar patut soang-soang krama Desa Adat sami masima krama / Dharma Santi.

Pawos 66

Bhuta Yadnya kawentenang manut babuatan, ring Purnamaning sasih Kawelu
kewentenang Bhuta Yadnya nangluk merana.

SARGA V.
SUKERTA TATA PAWONGAN

PALET I.
INDIK PAWIWAHAN

Pawos 67.

1. Pawiwahan inggih punika patemoning purusa pradana malarapan panunggalan kayun sukacita kadulurin upasaksi sekala kalawan niskala.
2. Pamargin pawiwaitan wenten tigang soroh luwire :
 - a. Pepadikan , kamanggalaanin antuk pakurenan utawi pakarunan.
 - b. Ngorod , ngerangkat riin wawu kakrunayang.
 - c. Nyeburin utawi nyentana (ri sampun ketegepin antuk upacara pejati / jauman)
3. Pidadab sang mawiwaha patut :
 - a.Sampun manggeh daha-truna .
 - b.Sangkaning padarena (tan kapaksa).
 - c.Nganut kecaping agama (tan gamya gamana).
 - d.Prade pangambile tiosan agama , kamanggala antuk banten panyambutan /Sudhi Wadani

4. Pamargin pawiwahan (parabian) inucap ring ajeng mangda taler manuting undang-undang panegarane inggih punika UU no.1 warsa 1974 saha PP no.9 warsa 1975 miwah pasuara sane kamedalang antuk Gubernur Kepala Daerah Propinsi Bali .

5. Sang sane murug kecaping ring ajeng manut tripramana , patut :

- a. Tan manut kecaping 3,2 menawi kapaksa (kaplegandang) antene kengin kapalasang tur kadanda ageng alit manut pararem.
- b. Sang sane saruron (ngicen) genah antene saha tan masadok ring prajuru adat lan dinas jantos 3 rahina suene , keni danda manut pararem . sang sane nyarengin mlegandang keni danda manut pararem
- c. Tan manut kecaping agama , patut parabiane kapalasang ,tur kadanda manut pararem.

Pawos 68.

1. Parabian sane kapatut ring Desa Adat Balangan Pawos 67 (1) ri sampun makaciina :

- a. Pawidi-widana, sanistane pabiyakaan (madengen-dengen).
- b. Kasaksiang antuk parajuru-parajuru Dinas lan Adat .
- c. Kaanggahang sajroning pailikitan tur katunasang ring sang ngawiwenang (camat).

2. Parabian tan kapatut sekadi :

- a. Nabtab upakara saking papaksaan .
- b. Sinalih tunggil tan rawuh miwah tan wenten ilikita .
- c. Nenten wenten saksi miwah ilikita.

Pawos 69.

Tatacaraning pawiwahan patut sekadi ring sor :

1. Sapasira ugi pacang ngawarangi pakulawargan patut masadok ring parajuru sane pacang maritatasang manut tan manut kakecap pawiwahan punika .
2. Pamargin parorodan :
 - a. Reraman lanange ngawentenang pamilaku (pejati) antuk duta sekirangnya kalih diri saha tan kengin kasepan ring arahina, sajawaning sang ngambil saking sios Desa, kengin nerima jantos 3 rahina.
 - b. Risampun reraman wadone nerima pamilaku , patut nepak kulkul manut mawos 23 (4) tan kengin kasepan ring arahina.
 - c. Prade nepak kulkul sangkaning tan nerima pamilaku , mapiteges ngawirosaning duta, wenang kulawarga wadone kasisipan manut pararem.
 - d. Yening tan wenten pamilaku , kengin netes (neteg) kaenter antuk parajuru dinas/adat saha nganutin tatacara netes.
 - e. Pagenahan antene tan kengin ring paumahan sang lanang, saderege mabyakala sajawaning wadone saking dura Desa Adat Balangan.
 - f. Yening antene miwah kulawargane pada arsa dados kabakta budal ring genah sang lanang wiadin wadone.
3. Sajeroning pakrunan (panglukuan) patut :
 - a. Kamanggalang antuk geng pangampura (malaku peilih) arep ring reraman wadone.
 - b. Kaigumang bebawos sang ngidih saha dewasa pakerab kambeyan ri wekas.
 - c. Taler kacihnayang mungwing purusa utawi sentana rajeg kajejerang , patut ngidih lanang.

d. Prade tan terima pakrunan kamargiang pepadikan jantos ping tiga.

4. Pakerab kambeanne mapiteges upacara tinas apadang (puput) mapikuren , dwaning manut sekadi ring sor :

1. Sajeroning babawos kambe kalaksanayang ring sekala niskala antuk sarana jejauman miwah pawidi-widanan :

a. Jejauman pinaka ngambe/ngadungang kayun soang-soang kulawarga wadone.

b. Widi-widana pinaka pajati niskala nunas wadone ring pamerajannyane.

2. Sajeroning pakeraban kalaksanayang ring sekala :

a. Antuk kasaksiang olih krama banjar duaning pacang kasiarang.

b. Pamekas panyaksi parajuru Adat lan Dinas tur ke ilikitayang .

3. Tan kapatutang makta jejauman ring dahane yening wenten kapihalangan.

Pawos 70.

1. Piteges pawiwahan, patut sang lanang marabi adiri asapunika sawaliknya, sajawaning pasubaya paitungan sios.

2. Dados marabi langkung ring adiri yening sampun polih paiguman olih-rabine sane dumunan.

3. Prade wenten logika sanggraha patut kasakapan tur keni pangerebu ring pura, yan tan satinut nyakaping keni sang lanang danda manut pararem, saha ngupakara bobotanniya. Prade sang mobotang langkungan ring adiri , soang – soang keni pamidanda manut pararem , saha ngrebu ring pura.

4. Prade wenten mamitra ngalang sang ngawenang cemer pajagatan desa adat Balangan , wenang kasisipan manut ring pararem , saha ngrebu ring pura , yening prasida kabuktiang manut tri pramana .
5. Prade wenten dratikrama muang paradara, kasisipang manut pararem saha ngrebu ring pura.

PALET 2.
INDIK NYAMPIHAN

Pawos 71.

1. Pawiwahan sida kawusan malarapan antuk palas marabian utawi padem.
2. Wusan mapakuren santukan sinalih tunggil lampus, mapiteges balu.
3. Palas marabian nenten sangkaning lilacita utawi wiwit wicara, makacihna tan tumus suka citaning panunggalan idep sang alaki-rabi, mapiteges nyapihan.
4. Sang ayat palas maparabian anut angka (3) ring ajeng atur supeksa pailikitan ring sang rumawos (Pengadilan) wastu tinas apadang pamutus kabawos nyapihan, ngalantur prajuru nyiarang kawentenannya ring desa, saha mapidanda panumbas suaran kulkul lan upakara-upakara siosan manut perarem.

PAWOS 72.
TATA CARA PALAS MARABI

1. Sular palas marabi prade sinalih tunggil: anyasar laku, cedangga, wirosaning laku, matilar tan masadok, miwah setata wak-parusa tan prasida malih adung.
2. Yening wicarane katumusang antuk lanange, patut maka cihna:
 - a. Istrine anyasar laku.
 - b. Istrine amandel sanggama utawi maambul-ambulan jantos 3 (kalih) sasih.

3. Yening wicara katumusang antuk wadone mecihna:
 - a. Lanange Dratikrama.
 - b. Wanglu .
 - c. Tan nyanggamen saha tan ngupajiwa jantos 6 sasih (bulan).

4. Prade manut tri pramana sang mawicara ajeng angka 2, 3:
 - a. Parabian kengin kapalasang.
 - b. Tan kengin makta arta brana (tatadan).
 - c. Katiwakin pamidanda, upacara nyasap ring pura Kahyangan miwah kasaksinin antuk parajuru Desa.

5. Prade palas parabian sangkaning pada lila cita patut:
 - a. Naur prabeya numbas pasuaran kulkul pada matenga.
 - b. Paguna kayan polih pahan pada.
 - c. Bekel/tatadan soang-soang kekuasa niri-niri, sakewanten warisan kakuasang antuk purusa.
 - d. Ngaweruhang miwah pangupajiwa pratisentana manut swadarmaning guru rupaka.
 - e. Katiwakang pamidanda manut angka 4, 3 ring ajeng
 - f. Pamidanda panyapihan kengin kamargiang ri sampun katiwakin pamutus antuk sang rumawos anut pawos 70. (4) ring ajeng. *

Pawos 73.

Prade ri wekas sang palas kacihnayang adung malih patut:

- i. Ngalaksanayang pawiwahan malih anut pawos 67 (1) ring ajeng.

2. Keni pamidanda nikel saking palase yadiastun wit palas inucap sangkaning pada lila, pamargane inucap kabawos tulak wali.

Pawos 74.

1. Balu kabinayang dados:
 - a. Balu luh wit sentana (rajeg) miwah balu luh boya sentana.
 - b. Balu muani kapurusan muah balu muani nyeburin (boya sentana).
2. Swadarmaning balu inucap patut:
 - a. Ngamanggehang pati brata, tan kengin ngamargiang paradara/dratikrama.
 - b. Ngawasayang waris pangunakayan, tan kengin ngadol, ngadeang, makidiang, sajawaning polih uak-uakan saking pianak utawi pakaluargaan ipun (prade pianake kantung alit-alit).
 - c. Kengin ngidih sentana prade sampun wenten pidabdab sadurung sinalih tunggil lampus saha kauakan antuk kaluargaan sinanggeh kapurusan.
 - d. Kawenangan mawiwaha malih prade sampun polih paigum saking i pianak daba/teruna utawi kaluarga kapurusan, tur prasida ngupajiwani sentana.

Pawos 75.

1. Balu kaucap tan pageh luwire:
 - a. Dratikrama/paradara.
 - b. Matilar saking paumahan tan pasadok, jantos 3 sasih.
 - c. Lempas ring suwadharmaning balu, tan prasida ngehehin solah maprewerti arep ring pituduh pakaluarga kapurusan.

2. yening macihne kadi ring ajeng manut Tri Pramana, wenang balu inucap inggihan balu luh boya sentana miwah balu muani nyeburin kengin:
 - a. Katundung antuk kaluarga kapurusan.
 - b. Tan polih upon waris.
3. Prade balu inucap pageh, katundung antuk pakuluwargan kapurusan kengin polih pahan pagunakayan.

PALET 3
ANGKAT SENTANA
Pawos 76.

Sane dados angkat kaanggehang sentana, jadma lanang utawi istri durung mapikuren, saha tuwuh utawi yusan ipun alitan ring sane ngangkat.

Pawos 77.

Pinih riin pangambilane patut saking purusa, yan tan wenten saking purusa wawu saking pradana, yaning tan wenten sina'ih tunggih wawu ngambil ring sapa sira ugi

Pawos 78.

Sentana sane manggeh pastika manut adat, sesampune majalaran upakara kasaksinin antuk parajuru Adat kalih kasiarang ring paruman krama desa/banjar.

Pawos 79.

Asing-asing ngangkat sentana sakadi ring ajeng, patut kasadokan ring Guru Wisesa.

Pawos 80.

Balu nyeburin, yaning ipun mapikuren, kasinanggehi kelesa.

PALET 4.

WARIS.

Pawos 81.

Sane sinanggehi waris artha brana lan tategenan.

Pawos 82.

Sane sinanggehi pawaris, prati sentana purusa, sentana peperasan sane pastika.

Pawos 83.

Pedum waris lanang lan istri patch, yaning sangkaning pada lila.

Pawos 84.

Waris kengin katerima antuk ahli waris, ri sampun sane ninggal (pewaris) ka aben.

Pawos 85.

Karang waris tan dados kaadol, kagadeang, katukar yan tan polih panyungkem (tan kasungkemin) antuk kulawarganyane.

Pawos 86.

Balu sane tan maderbe pianak, makta artha berana saking tatadan, artha berana punika tan kasinanggeh warisan.

SARGA VI.
DRUWEN DÉSA LAN KAHYANGAN TIGA

PALET 1.

DRUWEN DÉSA

Pawos 87.

Padruwen Désa Adat Balangan; Pura Kahyangan Tiga saha sadagingnyane, wantilan Désa Adat lan LPD Desa Adat Balangan.

PALET 2.

Pawos 88.

Sios ring Pura Kahyangan Tiga, Pura Pucak Gunung Agung, Pura Tapang, Pura Dalem Surya saha sadagingnyane taler druwen Desa. Tanah tegal, tanah sawah Kahyangan Tiga kawastanin Palaba.

Pawos 89.

Sakaluring padruwen Kahyangan Tiga inucap patut wenten ilikitan ipun.

Pawos 90.

Upon-upon Palaba Pura inucap kaenterang antuk Parajuru Désa kaanggen mecikang, miara kalih prabiya upakara parhyangan amongan Desa Adat manut pararem.

Pawos 91.

Sapasira ugi tan kadadosang ngadol, nukar, palaba inucap.

Pawos 92.

Druwen Desa lan Kahyangan Tiga patut kasadokang olih parajuru Desa majeng krama Desa nyabran asasih.

SARGA VII
PASUKERTAN DESA

PALET I.
PAKARANGAN.

Pawos 93.

Saluiring karang patut wenten margi.

Pawos 94.

Karang paumahan, teba, patut wenten wates panyengker utawi pagehan.

Pawos 95.

Karang paumahan mau lu kaler, tur kakuasa olih sane madruwe ulu.

Pawos 96.

Karang paumahan sane majeng ka margi, patut kasengker olih sane nruwenang.

Pawos 97.

Karang madruwe patelajakan olih sane wenten ring jalan Desa, margi ring ajeng majebar asanan wadah patut kapeliara antuk sane maderbe karang.

Pawos 98.

Ri tatkala ngaryaning panyengker pakarangan utawi wates sane ngalikadin patut kacumponin olih pangandinnyane.

Pawos 99.

Sapa sira ugi malaksana ring pawatesan lan panyengker sane ngawinan rusak lan mocolan anak tiosan , patut kasisipan :

1. Mecikang sahanan sane rusak.
2. Kadanda agung alit ipun manut pararem.

Palet 2.

TETANDURAN LAN PEPAYONAN

Pawos 100.

Tetanduran lan Pepayonan tan dados ngungkulin sane ngranayang bhaya paumahan anak tiosan, ri kala nandur dohnyane adepa agung kirang langkung , rikala nandur kalih tengah meter saking wates.

Pawos 101.

Ri tatkala wenten tetanduran utawi pepayonan sane ngelintangin karang paumahan patut kapasangin sepat gantung.

Pawos 102.

Tetanduran lan pepayonan sane ngranayang bhaya anak tiosan iwang patut genahnyane , katetepang olih prajuru Desa.

Pawos 103.

Pepayonan sane patut ka ebah utawi ka abut , ka totor , kalaksanayang olih sane maderbe wewenang , mawaneng kalih wuku utawi empat belas kasina ngawit saking panetepang tetepasang prajuru Desa.

Pawos 104.

Pepayonan inucap ring ajeng sane tan kalaksanayang olih sane maderbe kadanda manut pararem , pepayonan inucap kajarah olih Desa Adat .

Pawos 105.

Pepayonan sane ngarubuhin wewangunan anak tiosan . sane ngangken ngalaksanayang patut kasisipang negen prebiya . mecikang karubuhan saha maduluran upakara sapatutipun .

Palet 3.

WEWANGUNAN.

Pawos 106.

Wewangunan tan dados ngelintangan wates pekarangan, ngungkulin wewangunan anak tiosan .

Pawos 107.

Wewangunan sane kanggen krangkeng wewalungan, jempeng, kakus, pasiraman, pawaregan, kotorannyane tan dados nglintangin wates pakarangan.

Pawos 108.

Wewangunan ring pawos 107 inucap kotorannya patut kawenteng wangunan bambang / septiktank lan pengisepan .

Pawos 109.

Sapa sira piwal ring pawos 107 , 108 inucap patut kasisipang lan mecikan karusakan tur kadanda manut pararem .

Palet 4.
WEWALUNGAN

Pawos 110.

Sahananing wewalungan tan dados malumbar

Pawos 111.

Wewalungan masuku patpat sane malumbar patut kataban saha kasadokang ring prajuru.

Pawos 112.

Wewalungan sane kataban patut kaserahang ring sang sane maderbe , sesampune naur danda panebusan ring prajuru.

Pawos 113.

Pikolih panawuran lan panebusan kabukti antuk sane naban , prajuru lan krama Banjar, nganutin pararem .

Pawos 114.

Wewalungan sane tan wenten mariangken jantos asasih nanggu ping rahina utawi petang dasa kalih rahina wewalungan inucap dados kakuwasayang antuk sane polih naban miwah krama banjar.

Pawos 115.

Wewalungan ring ajeng inucap, padem sangkan tan karencanayang sane naban patut masadok ring prajuru . sane naban luput saking pagentosnyane.

Palet 5.
PEMARGIN SAWA.

Pawos 116.

Krama Desa patut maderbe margi ri tatkala muat sawa utawi makutang , sane mula dados utawi sane lumrah kaentasin muat sawa rawuh ring setra.

Pawos 117.

Ngentasin sawa ring tegalan , sawah manut pawarah prajuru Desa wiyadin prajuru Subak utawi Pakaseh , tegal wiadin sawah sane kaentasin inucap patut kaupakara antuk sang sane maderbe sawa, sepatutipun.

3. Ageni baya minakadi, umah puun.
4. Erbaya minakadi, belabar (kabanjiran).
5. Duracara baya ring Desa Adat, agama minakadi : masanggama ngajak buron, ngerusak parhyangan.
- 6.

Pawos 123.

Krama Desa, Krama Banjar sane uning kawentenan baya patut gelis nepak kulkul banjar cihna baya tur masadok ring prajuru.

Pawos 124.

Krama banjar patut gelis medal saha sregep gegawan ipun mapitulung ring sang sane keni baya.

Pawos 125.

Bhaya duracara, ring agama kabaktayang macihna antuk Tri Pramana, saksi ilikita bukti, sane malaksana patui kasisipang tur kadangda saha upakaraprayascitamanut pararem saha kaatur ring guru wisesa.

PALET 8

SASEBELAN

Pawos 126

Pangambilan Sebelan ring Banjar utawi Desa Adat iuir ipun :

1. Ngawit suaran kulkul cihna padem lan sakeng mapendem jantos tigang rahina.
2. Yening sawane kaaben, ngawit ngulapin jantos tigang rahina sakeng rahina pamuput.

SARGA VIII.
WICARA LAN PAMIDANDA

Palet 1.
WICARA.

Pawos 127.

Saluiring wicara patut kapuputang olih prajuru.

Palet 2.
PAMIDANDA.

Pawos 128

Saluirin wicara sane sampun janten patut prajuru nepasin sisip, sang sane keni sisip nglaksanayang utawi nawur buntas sajeroning pawanengan ipun minakadi pamidanda, hutang paturunan manut sekadi sane sampun kacumponia.

Pawos 129.

Saluirin danda, hutang, sane tan buntas kalaksanayang utawi katawur sajeroning pawanengan ipun prajuru patut mapakeling ring sang sane sisip.

Pawos 130.

Pakeling prajuru inucap tan kalaksanayang, arta berana sane sisip dados karampag, luir ipun ingon- ingon suku kalih, suku patpat, entik - entikan, pepayonan, sawah, tegalan, sawawaning perabot paon, sane kanggen ngrereh pangupajiwa, asapunika taler sane kinggilan manut agama Hindu tan wenang karampag.

Pawos 131.

Rerampagan kelaksanayang mawaneng pitung rahiña ngawit prajuru mapitahu ring sang sane keni rerampagan punika.

Pawos 132.

Rerampagan kalaksanayang mawaneng sajeroning senger pawaneng sang sane keni rerampagan nawur buntas kasisipan ipun.

Pawos 133.

Rerampagan kamargiang olih prajuru kasarengin krama Banjar ngrawuhin umah sane karampag tur ngambil artha berana sane kaserahang sane kanggen muntasin kasisipan ipun, minakadi hutang paturunan muang danda.

Pawos 134.

Artha berana rerampagan punika kakuasa antuk prajuru kanggen muntasin kasisipan sang sane keni rampag , patut kadol samael ipun kabiyaktayang ring krama Banjar , pikolih rerampagan lintang ring gebogan danda , hutang , salangkung ipun patut kabudalang ring sang sane keni karampag

Pawos 135.

Prajuru, krama Banjar, tan polih pedum saking palaksana punika.

SARGA IX.

PANAMPIH. -

Palet 1.

NGUWAH - NGUWUHIN

Pawos 136.

Awig - awig Desa Adat Balangan dados kewah - wuhin malih, sesampune kararemin antuk kalih pah tiga pupulan parum krama Desa.

Pawos 137.

Kaputusan nguwah - nguwuhin Awig - Awig Desa Adat Balangan inucap ring ajeng patut wenten ilikita saha lingga tangannyane tur kapidartayang ring krama Desa Adat, Bendesa Adat Balangan.

Palet 2.

PAMIDARTA.

Pawos 138.

Sane durung munggah ring awig -awig Desa Adat Balangan inucap tetep kamargiang nganutin dresta.

SARGA X.
PAMUPUT

Pawos 139.

Awig - awig puniki kakardinin, antuk, olih, saking, krama Desa Adat Balangan madasar antuk , dresta , purwa dresta , sastra dresta, desa dresta, saha sampun kamargiang sakeng nguni ring pakraman Desa Adat Balangan.

Pawos 140.


Awig -awig puniki kawastanin Awig - Awig Desa Adat Balangan, katetepan lan kesiarang ring rahina Saniscara, Wuku Uye , Sasih Karo Isaka 1913 , tanggal Masehi 10 Agustus 1991.

MARIPURNANG AWIG -AWIG

1. Awig-awig puniki Kaparipurnayang malih ring rahina : Wraspati, Wuku Bala, Sasih Jiyestha, Çaka warsa 1934. Tanggal Masehi 10 Mei 2012.
2. Maripurnayang Awig-awig puniki madasar antuk uger - uger sane sampun kamargiang ring Desa Adat Balangan. Katuntun olih Manggala Tim penuntun Jagat Badung; Ida Bagus Gede Puja, lan Manggala PHDI Jagat Badung ; I Nyoman Sukada. Prajuru Desa Adat kasarengin Panitia pinaka utusan krama tur kapidartayang ring krama, taler kauningin ring Sang Angawa Rat utawi Guru Wisesa Jagat Badung.
3. Luwir Sang Anglingga tangan :

Prajuru Desa Adat Balangan

1. Kelian Desa Adat



I Made Gama

2. Panyarikan



I Ketut Merta

Kaping kalih

Kelian Banjar Adat sawewidangan Desa Adat Balangan

1. Banjar Adat Balangan Kangin



I Letra

2. Banjar Adat Balangan




I Merta

Kaping tiga


Kasaksinin olih Prajuru Dinas sawewidangan Desa Adat Balangan

2. Banjar Balangan Kangin



I Nyoman Mudir

4. Banjar Balangan



I Made Murjana

Kaping empat



I Nyoman Suardana, S.Sos.MM.
NIP. 19721010 199302 1 002



I Rida Arsama, S.Sos

Kapikukuhin saha kalingga tangan olih



Anak Agung Gde Agung